

欽
定
全
唐
文

欽定全唐文卷六十二目錄

憲宗七

置遂平縣勅

平泉貨勅

禁私貯見錢勅

定量移左降官勅

停諸司道進奉勅

令史館紀時政勅

安置崔祐康州勅

令百僚議征李師道勅

同司官非連判勾簡官不必避嫌勅

宥淄青將士勅

討淄青禁諸軍擾民勅

賜王承宗物勅

禁官吏替代取置莊宅破除正額勅

放免京兆府夏稅大麥等勅

令孟簡計會水道勅

放四蕃歸國勅

貶嚴纂雷州勅

答宰相請上尊號表批

答宰臣請上尊號第三表批

答宰相等賀忠諫屏風批

答宰臣請上尊號第四表批

豐陵禮成優勞德音

平李錡德音

亢旱撫恤百姓德音

賑恤百姓德音

莊憲皇太后升祔山陵優勞德音

平吳元濟德音

平李師道德音

欽定全唐文卷六十二

憲宗 七

置遂平縣勅

勅文城柵將士百姓等脅汙之中同心効順率此危疑之俗盡爲忠義之人言念乃誠思加獎異爰圖改邑之制用表移風之美其蔡州行吳房縣宜改爲遂平縣仍於文城柵南新城內置便爲上縣權隸唐州

平泉貨勅

泉貨之設故有常規將使重輕得宜是資斂散有節必通

其變以利於人今繒帛轉賤公私俱弊宜出見錢五十萬貫令京兆府揀擇要便處開場依市價交易選清強官吏切加勾當仍各委本司先作處置條件聞奏必使事堪經久法可通行

禁私貯見錢勅

近日布帛轉輕見錢漸少皆緣所在壅塞不得通流宜令京城內文武官寮不問品秩高下並公郡縣主中使等下至士庶商旅等寺觀坊市所有私貯見錢並不得過五千貫如有過此許從勅出後限一月內任將別物收貯如錢

數較多處置未了任便於限內於地界州縣陳狀更請限
縱有此色亦不得過兩月若一家內別有宅舍店鋪等所
貯錢並須計用此數其兄弟本來異居曾經分析者不在
此限如限滿後有違犯者白身人等宜付所司痛杖一頓
處死其文武官及公主等並委有司聞奏當重科貶戚屬
中使亦具名銜聞奏其贍貯錢不限多少並勒納官數內
五分取一分充賞錢數其賞錢止於五千貫此外察獲及
有人論告亦重科處並量給告者

定量移左降官勅

左降官等考滿量移先有勅命因循日久都不舉行遂使幽遐之中恩澤不及自今以後左降官及量移未復資官亦宜準此處分如是本犯十惡五逆及指斥乘輿妖言不順假託休咎反逆緣累及贓賄數多情狀稍重者宜具事申奏聞其曾任刺史都督郎官御史并五品以上常參官刑部檢勘具所犯事由聞奏並申中書門下商量處分如未滿五考以前遇恩者準當時節文處分其復資度數準元和二年六月二十七日勅文處分

停諸司道進奉勅

勅伐叛興師久勞於外饋軍給費固已爲煩獻賀之儀諒
非朕志務從簡約式表憂勤其今年冬至及來年元日諸
司諸道進奉宜停

令史館紀時政勅

記事記言史官是職昭其法誠著在典常如聞近者難得
詳實思有釐改用存舊章舉而必書朕所深望自今以後
每坐日宰臣及諸司對後如有事可備勸誡合紀述者委
其日承旨宰相宣示左右起居令其綴錄仍準舊例每季
送史館以爲常例

安置崔祝康州勅

崔祝抵犯刑章宜加貶逐緣其身居憂服未可授官宜且於康州安置待服滿日處分其贓充進助者仍令度支收管本道觀察使覺察不早特宜釋放

令百僚議征李師道勅

李師道潛包禍心僞布誠懇緣自淮西用兵已後愆釁屢彰累有疏陳請捨兇逆當道租稅頻年不送陰通信使數致帛書又逆黨訾嘉珍等蓄聚兇徒謀燒洛邑所圖不軌臨發事彰又使其徒燒劫河陰庫倉沮國大計中使李重

秀宣諭到本道又縱官健凌暴況又元和十年六月傷害宰相事之端本實啟潛謀凡此罪名皆當不赦朝廷以新平淮寇貴且息人素爲含容令其獻効師道自知過咎難掩羣言累遣崔承寵王元同自將表陳請令長子入侍兼獻沂密海三州林英續來又獻三州圖印并奏其男發日國家每務宏貸屈法招綏今忽翻然盡變前意應所陳列無非妄言其師道并軍將健兒表共三道詞頗悖慢宜出示百寮議可征可捨以聞

同司官非連判勾簡官不必避嫌勅

應同司官有大功已上親者但非連判及勾簡之官並官長則不在迴避改授之限況國朝故事不少勅令明文具存其官署同職異司雖父子兄弟亦無所嫌起今已後宜準天寶二年七月六日勅處分

宥淄青將士勅

勅魏博及義成軍節度送到擒獲逆賊李師道下都知兵馬使夏侯澄兵馬使朱澄等共四十七人附麗兇黨拒抗王師國有常刑悉合誅戮朕以其久居汚俗皆被脅從況討伐以來時日未幾縱懷轉禍之計未有効款之由情似

可矜朕不忍殺況三軍百姓孰匪吾人詔令頒行罪止師道方欲拯於塗炭是用活其性命誠爲屈法庶使知恩並宜特從釋放仍令却遞送至魏博及義成軍各委節度收管驅使如緣父母血屬猶在賊中或羸老疾病情切歸還者仍量事優賞放去務相全貸何所疑留

討淄青禁諸軍擾民勅

寇孽背恩自取誅翦黎元不幸久陷凶殘王師有征義先拯物苟加殘暴諒匪予懷況諸軍討伐已來百姓歸投相繼旣足嘉恤尤宜撫存時屬春陽各務農業陶我惠化當

令便安其淄青四面諸道兵馬應入賊界收城邑所至百姓明加曉諭任其營生輒不得妄行傷殺及有拘繫焚燒廬舍掠奪資產開發墳墓等事並宜禁斷詔下之後已有處分今更申勅切在遵行

賜王承宗物勅

王承宗與三軍將士輸忠効力叶志同心恭守典章誓除寇虜俗化丕變風猷特高如聞水旱之餘供費未贍務令優濟保洽恩和宜賜綾絹布共萬端匹

禁官吏替代取置莊宅破除正額勅

如聞諸道州府長吏等或有本任得替後於當處置百姓莊園舍宅或因替代情庇便破除正額兩稅不出差科自今已後有此色並勒依元額爲定

放免京兆府夏稅大麥等勅

京畿之內供億所叢雖年穀比登而人食尚寡俾其存濟實在優矜其京兆府及諸縣今年夏稅大麥等共九萬四千六百九十四石並宜放免

令孟簡計會水道勅

江漢分流各有港路兩界但合論此不合勞人築隄今水

潦爲虞則慮先及低下其鷓鴣港宜令孟簡即與決開其
師子港塞來年月深久更委兩道計會詳盡本末事理

放四蕃歸國勅

劉闢招誘外蕃用資叛亂四蕃顧盟竟無助逆雖使在其
間而義無所失其吐蕃並分散送赴本界以其寒沍涉遠
各給衣物糧食發遣

貶嚴纂雷州勅

淄青營田副使兼齊州刺史嚴纂頃在賊中頗聞惡迹比
於流類自合加刑況昔歲赴官便道潛竄凶狂之狀物議

不容投彼遐荒尚謂宏貸除名配流雷州

答宰臣請上尊號表批

伏以高祖太宗接千載之統垂無疆之休太上皇承九聖之烈傳莫大之慶嗣德續業允文允武宏帝堯之欽明宗元元之清淨付朕天下頤神保和至道光於唐虞至仁合於天地卿等虔述休德祇獻鴻名循省再三允符朕意朕獲守寶位丕承睿訓雖虔恭寅畏不敢怠遑而澤未洽於羣生理未臻於皇極遽言徽號何以當之雖嘉乃誠難遂來請其上獻太上皇尊號宜依所奏凡百卿士當體至懷

答宰臣請上尊號第三表批

省表具知朕獲承丕緒以撫萬邦照臨無日月之明膏潤
無江漢之浸常恐吉蠲雖備未享於天心教道雖勤未諧
於人欲諒慙匪德敢議鴻名而宰臣羣公宗后庶尹上引
祖宗之丕矩下述黎獻之誠心誠予以處泰而思勞告予
以愛名而務實陳以懇迫至於再三先典不可以固違羣
情不可以屢阻與其牢讓而繁飾不若納規而徇公遽抑
至懷勉從來請顧惟不稱兢惕殊深

答宰相等賀忠諫屏風批

朕以負荷至大惕厲每深常所憂勤豈敢暇逸雖卿等竭忠獻替匡救之益旣多而朕亦追想聖明諫諍之規是渴所以列其事迹文以丹青嘉乎匪躬凜然在目庶以發揮寡昧辨察正邪置之坐隅所期於外獎示於卿等但表於衷懷詠之清風企以從政豈惟斯美得在前人卿等道極致君才周濟物弼違義激於金石成務功格於神祇事合公忠言形將順周省陳敘深覽誠明所賀知

答宰臣請上尊號第四表批

省表具知建崇名加大號必自盛德而因全功苟非其時

難以擬議朕紹十聖之統緒尊百代之憲章冕而事天憂
慄不暇乃者忠臣敦化良將策勲有寇難而必殄必平用
兵戈而不蝗不早此乃多士叶力成茲小康豈予一人獨
運而致卿等四陳章疏每瀝肺肝同士庶之誠心徵朝廷
之故實願飾虛美皆爲過談諭而復來勢不可止雖重煩
典禮殊不自安而深念奏陳亦當從欲勉依所請良用愧
懷

豐陵禮成優勞德音

朕聞王者大孝本於無違故由於禮則不替慎於終則歸

厚國有大事付予沖人永言營奉哀惶靡措雖仰遵先旨
已從儉於因山而俯徇度荒實載勤於復土況七月之會
萬方畢臻有供億之繁有車騎之雜賴上天垂祐庶務肅
成文物盡哀敬之容道路無風雨之氣粵自遷座至於返
虞人之叶從禮無違者此皆一二輔弼洎左右之臣至於
庶寮罔不盡力朕所嘉歎不忘於懷宜酬厥庸以序功次
其山陵使宜與一子七品正員官山陵禮儀使及陵所攝
太尉行事官與一子八品正員官山陵副使兵部侍郎判
度支李選禮部侍郎崔頌按行山陵地使並賜一級挽郎

代哭諸司職掌工巧雜設人夫車牛並詢其勞績秩以等級賜官及出身賜勲爵進階減勞選各有差

平李錡德音

天地之德佐助者忠良鬼神之靈斃踣者盈貫故有無狀之釁顛越以敗常則有不奪之誠感慨以明節易所謂功業見乎變書所謂不善降百殃積惡必至於滅身見幾寧俟於終日應若影響昭然著明李錡受恩三朝授任千里勺水拳石以至高深潤草塗原豈酬亭毒而棄我厚德稔其姦心滔天以肆其逆謀擢髮未窮其醜行乃者式舉戎

旃申嚴國刑將鼓雷霆之威以誅梟獍之罪鎮海軍左廂
兵馬使兼御史中丞子良等外宏智慮內激精忠擐甲執
兵取兇人之柄瀝肝嘗膽懷勁草之風迴戈以掩其羽毛
竟夕遂擒其魁首天府無一金之費已靜江流王師無一
戰之勞已除人害莫大之節卓然無倫非常之功斯謂不
朽高位重賞予何愛焉殊加榮寵用顯旌勸其張子良等
超異酬賞並從別勅處分其立功將士等並準平西川節
度例優賞甄敘其左廂官健等素聞効順亦宜霑賞並從
別勅處分王澹趙錡等仗節死義殺身成仁無罪罹辜受

金史卷之二十一
二
茲殘酷所宜褒表並勸忠貞即加追贈仍令州縣致祭收
葬其王澹如有子弟服滿日與一子八品正員官如更無
辜受戮及脫身効順者亦委元素具事聞奏當有褒贈及
加甄錄如受戮之中有長行官健勿停糧賜優給其家浙
西管內官吏及職掌人若被逼脅驅使者但情非同惡一
切不問每念疲忙久罹虐政而又迫於逆命驅以饋軍攫
斂則灌以漏卮傷殘則烈於猛火永言於此如納諸隍宜
申蠲貸之恩冀息呻吟之苦其潤州今年秋稅未徵納者
一切放免其管內諸州縣如李錡作亂之後橫加徵剝委

元素審加勘責具色目聞奏其榷酒錢亦宜處置聞奏應
討伐之師如未出本界者委本道量加賞給如已出界者
仰具聞奏朕惟前王之訓欽慎典刑今爲惡者就誅而建
勲者已錄庶將橐弓偃革遂物之生成力穡勸功致人於
富壽覆車垂永鑒之轍端展扇無爲之風咨爾萬方宜知
朕意

亢旱撫恤百姓德音

承天理物莫尚於愛人謝譴弭災必先於咎己朕臨御萬
國逮今五年亦常勵精罔敢暇逸誠雖勤而未妥於事澤

雖布而未浹於人吳蜀建功關輔屢稔羣生成若荒服會
同將何以答昊穹之顧懷承宗社之眷祐固宜示以災眚
警予增修自去冬以來時雪微降及此春暮積爲憊陽宿
麥不滋首種未入東作慮違於農候西成何望於歲儲爲
人父母甚可憂憫況江淮之間歉饉相屬物力疲耗人心
無聊雖存救之術已行而凋傷之弊猶切是用輟食而嘆
中夜以興得非刑獄之冤滯未申貨財之聚斂未息忠鯁
之言未盡達不急之務未盡除有一於茲即傷和氣居高
莫喻愧悼是懷爰命禱祠豈答神祇之望空勤惕厲豈爲

恤隱之方莫若側身推誠循政務實法乾坤易簡之理贊
天地茂育之仁將以塞違庶孚於道屬陽和之序品彙敷
榮俯念繫絁俾從寬減其京城內見禁囚徒犯死罪非殺
人降從流流已下罪遞減一等鹽鐵使下諸鹽院舊招商
所由欠貞元二年四月已前鹽稅錢及永貞元年變法後
新鹽利經貨折估錢共二十八萬七千七百五十六貫文
並宜放免除此錢外諸色所由人戶及保人有積欠錢物
或資產蕩盡未免禁身或身已死亡繫其妻子雖始於冒
沒而終可哀矜宜委鹽鐵轉運使即據狀事踈理具可徵

可放免數聞奏度支京西京北諸院權鹽使并畿內在城諸色所由人戶欠負從貞元十一年以後至貞元十五年終主保逃亡攤徵保人并保人又逃亡及身在貧窮非家業見存姦滑延引者所欠錢物斛斗柴草等項亦宜放免亦委度支續具合放數聞奏諸道兩稅外據權率比來創制勅處分非不丁寧如聞或未遵行尚有此弊永言奉法事豈當然申勅長吏明加禁斷如刺史承使牒擅於界內權率者先加懲責仍委御史臺及出使郎官御史察訪聞奏夫制事立程必根源本未有上敦節儉而下有困窮上

好豐盈而下獲安輯顧財用之所出念耕織之爲勞自中原宿兵調賦尤廣更修無名之貢獻必有無藝之徵求或稱出於羨餘或稱不破正稅相因慕效寢以成風革弊立防何切於此其諸道進獻除降誕端午冬至元正任以土貢修其慶賀其餘雜進除旨條所供及犬馬鷹隼時新滋味之外一切勒停如違越者所進物送納藏庫仍委御史臺具名聞奏如諸道停進奉後尚務因循或有聚斂亦委出使郎官御史察訪聞奏政理之本在於簡約由內及外以示率先昨者六宮內人量已放出猶慮內廐之馬其數

稍多委飛龍使等

詔令作郎

條流減省續具聞奏嶺南黔中福

建等道百姓雖處遐俗莫非吾人多罹掠奪之虞豈無親愛之戀以茲興念良用憫然應緣公私買賣奴婢宜令所在長吏切加捉搦并審細勘責委知非良人百姓然許交關有違犯者準法條處分朕理國濟人以義爲利務於當者必舉詢其弊者必除其在卿士叶心方岳宣力勉修爾職以惠黎元慎守彝章咸悉朕意

賑恤百姓德音

勅王者本憂人之心有順時之令故及發生之候必宏利

澤之規以此惠人期於阜俗今三陽布和萬物遂性惟人之窮乏者或不能自存朕所以愍然省憂議所賑救如聞京畿之內緣舊穀已盡宿麥未登尚不足於食陳豈有餘於播種勸其耕植固在及時念彼徵求尤資寬貸京兆府宜以常平義倉粟二十四萬石貸借百姓其諸道州府有乏少糧種處亦委所在官長用常平倉米借貸淮南浙西宣歙等三道元和四年賑貸米並宜停徵容至豐年然後填納編戶之徵既有藝極字吐之要當恤有無苟徵歎之不時則困弊之無日近緣諸州送使錢物回充上供合送

使者使司又立程限所以每至歲首給用無資不免量抽
夏稅新陳未接營辦尤難委觀察使宜以供軍錢方圖借
便輒不得量抽百姓夏種夏貢有差先乎任土周幣殊等
實在使人近日所徵布帛並先定物樣一例作中估受納
精粗不等退換者多轉將貨賣皆致損折其諸道留使留
州錢數內絹帛等但有可用處隨其高下約中估物價優
饒與納則私無棄物官靡逋財其所納見錢仍許五分之
中量徵二分餘三分兼納實估匹段錢以準貨本約重輕
制之不均遂權百物由是競爲蓄聚漸爽流通粟帛轉賤

農桑益廢若無釐革其弊難堪公私交易十貫錢已上即須兼用匹段委度支鹽鐵使及京兆尹即具作分數條流聞奏茶商等公私便換見錢亦須禁斷自定兩稅以來刺史以戶口增減爲其殿最故有折戶以張虛數或分產以繫戶名兼招引浮寄用爲增益至於稅額一無所加徒使人心易搖土著者寡觀察使嚴加訪察必令詣實朕嗣守丕圖於茲七稔每念萬方所奉唯在一人百姓未康豈安終食故所以賑贍優貸思致乂安方鎮牧守誠宜遵奉如有違越委御史臺及出使郎官御史訪察以聞宣示中外

明悉朕意

莊憲皇太后升祔山陵優勞德音

孝本因心自天子而下達禮當從祔由聖人而設範朕以寡祐夙懼憫凶追攀弓劒閉橋山而未幾永慕禕翟合源陵於此時昊天罔極追感無盡俾竭誠敬用申哀懷而冢臣大僚庶尹羣吏靡不夙夜展其勤勞備物之容旣陳嚴奉之敬斯在始終罔替差次宜勞式舉彝章俾新渥澤山陵所攝太尉行事官與一子七品正員官山陵禮儀使與一子八品正員官山陵副使賜爵一級其下優賜各有差

園陵所供役爲勞憫茲充奉之勤宜頒施舍之令其富平
縣今年夏稅除折諸色價及已徵納青苗錢除捐外並宜
放免

平吳元濟德音

朕聞天地之於萬物也道深煦育而雷電震曜時警其不
庭帝王之臨九有也德尚撫綏而原野陳師必加於有罪
是以將伐而捨義在止奸禍召由人孽固難逭朕嗣膺寶
歷恭守丕圖自靖亂巴庸除妖海浙戡翦羣慝將期理平
全保太和非欲生事逆賊元濟蓄奸稔惡憑固阻兵擅釋

父喪悖違君命行虧天性義絕人倫厲殘忍之聲豺狼是類忘生成之德梟獍爲心大告屢加逆謀轉甚是用宜社至於出軍猶宏弔伐之方必兼討論之命元臣統護授幃幄之深謀上宰專征運廟堂之成算羣帥畢力萬旅一心戰以力摧襲由奇勝李愬全師直進堅壁洞開兇徒就執於城池餘孽奔降於草莽霧廓冰泮淮瀆水清斯皆宗社垂休人神協贊仰荷靈睭俯嘉衆誠共協勤勞予用惕然衷懷載益之厲頒爵授賞予何愛焉其收蔡州擒吳元濟節度及諸大將等宜從別勅處分諸立功將士等委韓宏

裴度行營諸道節度使速條流等第聞奏即有甄升其賞物等已令節級優厚支遣具別勅處分其投降將士亦委韓宏裴度與諸道節度使計會條流聞奏其中有是親差百姓子弟兵便放歸營農仍具數聞奏其淮西諸州縣官吏將健等雖被脅汙皆非本心除同惡巨蠹者一切不問其淮西百姓等陷此兇逆久罹殘傷莫匪吾人寧忘優恤宜準元勅給復二年仍委州縣長吏設法安撫其近賊四州自王師問罪供億實繁頻有優矜放其稅賦尚慮人多困極務俾昭蘇其來年夏稅亦宜放免比來諸州府供行

營勞役尤甚宜令放免委有司條流聞奏即議優卹自經戰伐所有傷痍至於徇國捐軀效忠立節每加憫歎寤寐是懷官軍陣亡將士並委韓宏裴度與諸軍審勘具名銜事跡申奏即與褒贈其家口等並委本軍優賞仍五年不停衣糧并所在州縣速爲收葬仍量事致祭於其家將士有因戰陣傷損以致殘廢者各委本軍厚致優卹仍勿停衣糧其陷在賊中官吏將士百姓等應有節義著明無辜受戮者宜令州縣府長吏致祭收葬仍委節度使具名跡聞奏當有褒贈仍優賞其家先已褒贈者委長吏訪其子

孫聞奏當與甄錄其家亦準例優賞於戲制理垂規每思去殺而亂常作逆多自干誅爰念興師至於殄寇累年之內徵役靡寧除害雖本於愛人敷化終慙於用鉞宵衣永歎良所愧焉咨爾萬方宜諒予志

平李師道德音

門下朕聞三光下燭懷忠秉義者其節必彰四海有君作逆崇奸者其禍必大況乎恩有負於覆載禮自悖於君親罪盈而神怒旣加惡稔而人謀乃發衆所共棄誅何可逃逆賊李師道苞慝稔兇背德蔑義動皆干紀言必欺天固

海岳之山川爲蛇豕之窟宅忘寵祿於累代恣殘忍於一方
阡亂自至於滅身冒戮難窮於擢髮朕祇臨寶位仰奉
丕圖除暴本務於好生用武尚慙於耀德肆命羣帥會兵
龜蒙旗鼓相望城壘連下淄青都知兵馬使金紫光祿大
夫試殿中監兼監察御史劉悟義勇中激沈謀外通攄三
軍嚮順之誠申列郡受汙之憤迴戈首唱萬旅響從渠魁
就殲梟獍同戮載馳闕駟函首上聞氛祲廓清方隅底定
功有卓異理當優崇旌善勸能用昭必信其劉悟所酬官
賞並從別勅處分其同立功將士等賞物已處分支遣委

宣撫使楊於陵與本道計會速條流功效等第聞奏續加
甄獎魏博以全軍濟河俯壓賊壘摧攝兇狡導致良闕叶
謀祚爲保授旣翦逆豎宜甄茂勲諸道行營咸盡忠力至
於攻取尅捷旣聞應緣討伐將還之際合有宴勞賞賜等
並從別勅處分委各本道條流有功將士聞奏當議甄錄
其淄青管内州縣官吏軍鎮將健及諸色職掌人等久罹
脅汚自拔無由撫事量情亦可矜恕除同惡巨蠹者其餘
一切不問其淄青道百姓等陷此兇逆久被殘傷昨因阻
兵尤肆暴虐吾人是念豈忘優矜宜給復一年仍委本道

州縣長吏設法撫綏其管內有高年廢疾并鰥寡惻獨貧弱尤甚者委觀察到日差官存問並量與粟帛訪聞比者賊中應有百姓斛斛皆被收納今春農時貧乏者衆恐不辦耕桑失生業者宜令存問如有此色取所舊貯斛量事給與令充種食俾得存濟其賊中雜差點子弟夫役便放還本處其中有不能自存者量事優卹百姓商旅諸色人中有被分外無名賦斂者並當勒停自興討伐言念傷痍扞患捐軀納忠徇國良深隱憫寧捨寤懷其官軍有陣亡將士等委本軍審勘具名銜事跡申奏即與褒贈仍令

本軍優賞其家三年不停衣糧并委所在州縣速與收葬
量事致祭其將士有因戰陣傷損尤甚以致殘廢者各委
本軍厚加優卹仍勿停解其陷在賊中官吏百姓等應有
節義著明無辜受戮者宜令州府長吏致祭收葬仍委節
度使到日具名跡聞奏當有褒贈仍優賞其淄青封域歷
稔氛昏管內名山大川在祀典者宜令宣撫使與本鎮計
會差官備禮致祭其祠廟中應緣陳設器服等物是賊中
所置者並宜廢撤特加修換用致虔誠於戲朕恭已嚮明
撫御九有推情以恕出令在寬而叛逆反常自貽天討迷

於告諭速彼誅鋤轉禍必有忠臣爲亂同於覆轍旣除逋
寇庶洽大和偃戢干戈諒從此始布告遐邇咸使聞知主
者施行

欽定全唐文卷六十三目錄

憲宗八

上順宗尊號冊文

贈高崇文司徒冊文

冊鄧王爲皇太子文

贈吳少誠司徒冊文

冊遂王爲皇太子文

命皇太子即位冊文

改元元和赦文

南郊赦文

冊皇太子赦文

平淮西大赦文

上尊號赦文

大乘本生心地觀經序

欽定全唐文卷六十三

憲宗八

上順宗尊號冊文

維永貞二年歲次景戌正月景寅朔皇帝臣某稽首再拜
奉冊言臣聞上聖元邈獨超乎希夷強名之極猶存乎言
象豈足以表無爲之德光不宰之功然稱謂所施簡冊攸
著涵泳道德感於精誠願奉洪徽有以自竭伏惟太上皇
帝陛下道繼元功業績皇極膺千載之休厯承九聖之耿
光昭宣化源發揚大號政有敦本示儉慶有格天漏泉恩

翔春風仁育羣品而功成不處褰裳去之付神器於沖人
想汾陽以高蹈體堯之德與神同符其動也天其靜也地
巍巍事表無得而言顧茲寡昧屬膺大寶懼忝傳歸之業
莫申繼述之志夙夜兢畏惟懷永圖今天下幸安皆睿訓
所被而未極徽號孰報君親是以臺臣庶官文武之列抗
疏於內方伯藩守億兆之衆同辭於外請因壽厯以播鴻
名臣不勝大願謹上尊號曰應乾聖壽太上皇當三朝獻
壽之辰應五紀啟元之始光應徽稱允協神休斯天下之
慶也

贈高崇文司徒冊文

維元和四年歲次己丑十月癸酉朔十三日乙酉皇帝若
曰自我有國大諸侯之勲勞者必勒功圖形播於鐘鼎藏
於盟府歿則極異等之禮以嘉魂魄使奮乎百代之上百
代之下爲臣者莫不興起也咨爾故邠寧慶等州節度支
度營田觀察處置等使充京畿諸軍都統開府儀同三司
檢校司空同中書門下平章事持節邠州諸軍事兼邠州
刺史上柱國南平郡王食邑三千戶高崇文英姿絕羣雄
畧神授上通星辰之氣克扶期運之數少事塞門保寧朔

漠千秋之勇常冠軍鋒吳芮之忠早書令甲頃以井絡之下盜臣流毒獸心狼顧誘脅我人遂拜於齊壇授以蕭斧束馬蓐食先命戒途曾無再籍之役不用一卒之死生致首惡戮屍天街西南晏清按堵如故禮加九命秩尊三事貴列東第壤踰徹侯動盪夷夏輝灼編簡進律遷秩兼制舊疆臥鼓翳扉解甲休卒期以無征逮乎三垂暗忽生災壽量中輟維屏之嘆瞿然疚懷故命國子祭酒劉宗經副使司勳郎中李直方持節冊贈爾爲司徒賻襚命數率禮加等式表無原之功用申不檢之賞將我痛悼告於幽神

冊鄧王爲皇太子文

維元和四年歲次己丑十月癸酉朔十八日庚寅皇帝若
曰於戲昔禹有聖子克承父業故三王代襲以天下爲家
我唐受天明命垂二百年欽惟十聖虔嗣寶厯亦罔敢越
丕子之貴傳序相受以及予一人獲奉珪幣事上帝承宗
廟夙夜祇懼不敢荒寧永惟負荷思建儲貳須假五載相
時一德允屬於爾元子鄧王寧惟爾兩曜分輝五行總秀
體資上哲性被至仁粵在幼沖挺然岐嶷寬厚之量匪由
師訓溫恭之德稟自生知爰撫藩封式崇磐石河間之泉

懿決策不窮東海之開明視牘能辨陪厚宗祀贊獻郊禋
展禮克誠執事惟敬勤龔子道左右朕志旋觀表識宜踐
青宮訊於蓍龜靈命不二謀及卿士人心協同尚膺七鬯
允事監撫是用命爾爲皇太子往欽哉莫尊匪君爾爲之
臣莫親匪父爾爲之子愛敬誠矣忠孝並焉爾其虛受以
下賢齊肅以成德無以崇廣處已無以怠忽臨人繼明四
方以貞萬國永言配命可不慎歟

贈吳少誠司徒冊文

維元和四年歲次己丑十二月壬申朔二十七日戊戌皇

帝若曰歿加榮號所以勸人示其爵列之差用彰禮命之數咨爾故彰義軍節度支度營田申光蔡等州觀察處置等使光祿大夫檢校司空同中書門下平章事使持節蔡州諸軍事兼蔡州刺史上柱國濮陽郡王吳少誠嘗賈拳勇習知戰陣服上將之號令爲中書之首出及鑿門建牙授以封域稜威以行法制峻文以輯賦輿當先聖之委遇極寵祿之休顯序位列公台之盛茅土有侯王之尊謂終享遐紀策勲功令壽量斯盡軫於予衷今遣使權知宗正卿李詞副使起居舍人裴度持節冊贈爾爲司徒於戲守

屏之臣注意斯重昭我寵渥藏於後昆

冊遂王爲皇太子文

維元和七年歲次壬辰十月景戌朔十七日壬寅皇帝若
曰於戲建立儲嗣崇嚴國本所以承祧守器所以繼文統
業欽若前訓時惟典常越我祖宗克享天祿奄宅九有貽
慶億齡肆予一人序承丕構纂武烈祖延洪本支受無疆
之休亦無疆惟恤負荷斯重祇勤若厲永懷嗣訓當副君
臨咨爾遂王恒體乾降靈襲聖生德教深蘊瑟氣叶吹銅
早集大成不屑幼志溫文得於天縱孝友因於自然符采

昭融器業英遠爰膺錫社實寄維城懿河閒之不羣慕東
平之最樂自頃離明輟曜震位虛宮地德可尊人神攸屬
式稽令典載煥徽章是用冊爾爲皇太子往欽哉有國而
家有君而父義兼二極重繫萬邦何好非賢何惡非佞何
行非道何敬非刑居上勿驕從諫勿拂懋茲乃德惟懷永
圖用陪貳朕躬以對揚休命可不慎歟

命皇太子即位冊文

維元和十五年歲次庚子閏正月甲辰朔越三日景午皇
帝若曰於戲上天降鑒保乂于我國家十聖丕承光宅四

海鴻休大業以逮予一人嚴恭祇畏懼弗克荷賴宗社垂
慶生靈乂安今朕寢疾彌留弗興弗寤神器所付屬之元
良咨爾皇太子恒孝友聰明溫文睿哲自主七鬯日新厥
德必能續序朕志綏靖萬邦是用命爾陟於元后宜令中
書侍郎平章事令狐楚奉冊即皇帝位懋建皇極無忝我
祖宗之休烈

改元元和赦文

朕聞明王之以孝理也必先之以博愛臨之以莊敬由一
人之至德鼓四表之懽心臻於太和以育庶類則下知禁

而無犯上措刑而勿用斯道不遠宏之在予朕以寡昧嗣
守丕業荷累聖之鴻休稟太上之嚴訓夙夜寅畏不敢荒
寧承顏而退省萬幾問寢而下臨四海虔奉惟眷施於兆
人皇王以來孰有斯慶端本之化自予躬行總百行之源
刑四方之理推恩以覆育廣敬以昭事王者要道朕其庶
乎則日月之燭臨可以率俾昆蛟之涵養期於不夭是必
家至日見而後化洽刑清圖始所難慎終斯勉猶恐下愚
之人因循陷辟官師之長教道未明迫於饑寒遂愆禮節
詿誤之網顧失政而多途哀矜之人雖得情而勿喜思與

公卿大夫下及士庶人勵翼循省以圖將來其因體元之始覃此惟新之澤上報於君父下念於蒼生頒慶紀年鴻恩斯洽可大赦天下改永貞二年爲元和元年自元和元年正月二日昧爽已前大辟罪已下常赦所不原者咸赦除之京畿諸縣今年十二月青苗錢及榷酒錢並宜放免地稅率於每年斛量放二升江淮荆襄等十州管內水旱所損四十七州減放米六十萬石秋稅錢六十萬貫內外文武見任在官神策六軍諸道將士等各賜爵加勲有差自武德已來功臣子孫與官及出身文武常參官觀察節

度團練經畧使刺史六軍大將等父母亡歿與贈官至德以來任宰輔與追贈及諡陝州奉天元從功臣普恩之外更賜勲爵中書門下及外使宰相宜與一子七品官東都留守六軍大將等與一子出身東官官並與改官其撰冊文官等與一子官及勲爵有差天下百姓高年者賜米帛羊酒國子監祭酒司業及學官並先取朝廷有德望學識者充東都國子監諸館共置學生百員應天下州府每年所稅地丁數內宜十分取二均充常平倉仍各逐當處穩便收貯以時價糶糶務在救人

南郊赦文

朕聞王者大業孝莫盛於配天國之大事禮莫尊乎享帝
故二儀合祭知上天所子之仁萬國駿奔觀聖人嚴父之
道教之所設禮極於斯我國家祖武宗文繼天撫運聲名
所被車書必同承祧而御極業光十聖體元而紀號年將
二百朕以微眇纘奉昌圖畏此洪業若臨深谷而大事所
屬仙寢維營凶德相挺兩隅皆阻淮湖奧壤水旱愆期怒
然疚懷懼不克濟既而上天降祐烈祖垂休妖氛盡殄逆
節咸伏精禋有以相盪善惡有以相資五兵纔試而復藏

四氣應序而咸理物皆滋茂歲亦豐登百姓之心懽然相與是用齋精三日款謁上元明發不寐祇見烈祖周旋在位陟降是依克配之禮旣展如在之誠增慕嘉此福祐與物惟新式敷雖若之化俾洽霈然之澤可大赦天下罪無輕重常赦不原者咸赦除之左降官與量移及復資仍聽累敘流移配隸並放還天下應有逋欠在百姓腹內者及京畿今年夏青苗錢並放免官酤酒及雜權率並同禁斷淮南江南去年已來水旱疾疫其稅租節級蠲放天下兩稅貞元四年制書已令三年一定委有司舉舊勅商量處

置諸道年終勾當宜停刺史錄事參軍並不得擅離州其事類已後制勅速令有司刪定江淮大縣每歲據闕委三省御史臺諸司長官節度觀察使各舉堪任縣令不限選數並許赴集臺省官及刺史亦令有闕先於縣令中揀擇如有能否與元舉人同賞罰復置具員簿以序內外庶官禁郵驛假託乘勢京兆府諸司色役人各令條流簡省天下官吏應行鞭撻責情致死切令察訪王府六品已下官及諸州縣有獄并省處分諸官諸使有要停減者委有司商量廢省天下百姓不得冒爲僧尼道士以避徭役其創

造寺觀廣興土木者舉勅處分内外文武見任及致仕官
諸軍將士等以品秩節級賜勲爵文宣王及二王三恪公
主諸王與一子官仍賜物有差宗子中有才用者委中書
門下量才敘用故尚父子儀太師晟太尉秀實顏真卿顏
杲卿張巡許遠南霽雲及配享功臣與一子官及出身有
差至德已來功臣未配享者速令詳定文武常參官及諸
道節度觀察使等并諸軍使並與父母封及追贈并一子
官及出身有差諸軍立仗及在本營節級賜物應緣大禮
職事官並賜階爵天下諸色人中有賢良方正能直言極

諫博通墳典達於教化軍謀宏遠堪任將帥詳明政術可
以理人委內外官各舉所知當親策試天下百姓高年者
賜米帛羊酒物及版授官封名山大川及古聖帝明王忠
臣烈士各令以禮致祭

冊皇太子赦文

門下朕丕承寶圖撫有方夏夙夜寅畏不敢荒寧永惟祖
宗之鴻業歷考前王之令典思所以垂統立極事神保人
推明至公安固大本尊廟祧而主七鬯嚴社稷而奉粢盛
俾開春闈乃命元子斯古今之通誼也皇太子寧清明體

仁莊敬好禮服典謨之誼一君親之誠允諧詢謀用建儲貳爰以吉日冊於明廷鼓鐘載和文物大備盛禮云畢慶感良深是宜布澤申恩自中達外厥有前躅舉而行之自元和四年十月十八日昧爽以前天下應犯死罪非殺人者降從流流罪已下遞減一等左降官未經量移者即與量移文武常參及諸州府長官子爲父後者賜勲兩轉應緣冊禮行事官賜階及勲爵有差鄧王府官量與進改夫輔翼元良教諭成德使目睹正事耳聞正言形於施爲漸於心術非齋莊忠慤之士不在茲選工部侍郎歸登給事

中呂元膺並踐履端方行義修潔通於經訓而得其要達於教化而蹈其中侍講承華師範磐石訪乃公議副予精求並可充皇太子諸王侍讀登宜加一階元膺宜賜紫金魚袋天下孝子順孫先旌表門閭者委所管州縣各加存恤五嶽四瀆名山大川委所在長吏量加祭祀

平淮西大赦文

朕聞王者法天作則與衆守邦奉天無私居兆人上當恭己嚮方之際切臨深馭朽之懷憂勤靡遑今古何遠所重者兵革不試軌度自貞熙仁扇和以至大道朕顧惟菲德

祇奉睿圖承昊天之眷命續列聖之丕緒晷食以求至理
虛心而俟昌言兢兢業業常懼失墜逮今十有四年矣道
且希於廣運意常在於包荒推誠則深感物未至頃歲蜀
川浙右怙亂阻兵人神共誅翦滅相次姑務偃革期於措
刑方簫勺以懲姦庶干羽以成化而淮蔡寇孽稔禍挺災
問罪興師蓋非獲已每念征行之暴露軫餽給之煩勞中
宵惕然載益祇勵妖凶旣殄黎庶用康斯皆宗社垂休中
外協力將勤恤於下土冀昭答於上元茲朕所以思與羣
公卿士勵精於庶政也屬獻歲發春授時惟敬勾萌盡達

幽蟄咸蘇微纒可矜鰥恤存念俾踈網之是浹與慶澤之
惟新可大赦天下元和十三年正月十日昧爽已前大辟
罪已下咸赦除之惟官典犯賊不在此限左降官及流人
移隸等並與量移近處別勅因責降授正員官所司亦與
處分其淮西管內縱有迹同惡逆掛涉流言事在往時一
切不問如聞申光蔡澱四州百姓干戈之後餓殍爲病宜
委所在長吏設法綏理先入擒吳元濟立功將士委韓宏
條疏宜速具功勞等第聞奏待有甄獎處分天下諸州府
百姓兩稅之外輒不得更有差率已頻申勅尚恐因循宜

委御史加糾察其諸道州府縣用兵已來或慮有權置職
名及擅加科配事非永制者一切禁斷淮西側近應緣資
給軍用權稅經奏請者各委條疏停省王承宗若束身赴
闕捨而不問仍加官爵其度支元和二年已前諸道借假
及懸欠錢物斛斗雜物當四百八十餘萬貫石端匹枚具
斤兩等並放鹽鐵戶部諸監院應有欠負亦疏理減放二
王三恪及文宣公各賜物五十匹神策六軍威遠金吾及
皇城等緣御樓立仗將士等及在城蕃客各賜物有差故
尚父子儀贈太師晟贈太尉秀實杲卿真卿張巡許遠南

霽雲與一子官出身有差中書門下及文武常參官諸道
節度觀察神策諸軍等使祖父母節級與贈封官存者量
與致仕及邑號天下百姓高年賜米帛羊酒有差

上尊號赦文

門下朕聞惟人戴后因事必極於推尊惟辟奉天有善必
歸於讓德式敷景化以答元功居有勞謙之思進多滿假
之懼緬自邃古何嘗不由是而致理焉朕獲纘睿圖祗膺
神器上奉大祭下安羣生恭己臨軒兢懷馭朽志欲周於
四海念常切於一夫盱食宵興唯恐失墜運屬休泰時丁

小康方隅廓清氛祲銷盪斯乃上荷乾坤之垂祐宗社之
降靈下賴卿士之叶心戎臣之宣力端拱嚮道推誠任能
豈予寡昧用集丕績況至化猶鬱勤憂未寧而中外臣僚
文武多士累陳懇䟽並進昌言願獻鴻名以增虛美拒衆
心而率籲轉切顧眇身而內愧靡安乃撰吉辰爰受典冊
禋告於清廟虔聞於昊天當茲盛儀夕惕增厲於戲朕自
御極再加景號在徽章而孔備諒浮實而多慙宜因行慶
之辰誕布惟新之澤與物咸遂永孚於休可大赦天下自
元和十四年七月十三日昧爽已前大辟罪已下已發覺

未發覺已結正未結正繫囚見徒罪無輕重咸赦除之唯
故殺人及官典犯贓不在此限左降官量移近處已經量
移者更與量移如復資者即任赴選集丁憂去任服闋日
亦與量移如有親故在上都任於所司陳狀便與處分不
必更待本州申請如準前制已合量移有司未注擬者並
任累敘并別勅因責授降資正員官所司亦與處分亡官
失爵放歸不齒者量加收敘流人移隸等並與量移近處
僧尼道士移隸者得罪人已亡歿家口未放歸者一切放
歸如有情願住者亦聽住左降官及流人先有官者如有

已亡歿各還本土應反逆緣坐配流在遠處身已亡歿者
如有親戚任便歸葬棄瑕宥過旣咸達於幽明錄善舉才
庶無遺於廢滯或中外前資見任官如有因瑕累未經錄
用并左降官事情可恕才行足稱者宜委中書門下量加
簡拔隨能錄用妖凶久阻汙脅所加今旣盪清宜從洗滌
其淄青舊管內官吏將士百姓等縱有跡同惡逆掛涉流
言事在往時一切不問維新之後仍不得遞相糾告革其
弊俗阜彼遺人切在分憂期於共理鄆曹濮淄青沂海等
三道百姓久淪寇境皆被傷殘宜委本道觀察使刺史設

法綏撫務令安輯勲籍所著常典必行常恐踰時無忘終
食應平溜青諸道立功將士宜委本道速準前勅條疏聞
奏當與甄獎自經討伐鋒刃所交言念傷殘每深憫惻其
溜青舊管四面官軍陣亡將士等已有前勅處分收葬量
事致祭其是賊徒遺骸委在中野者亦委所在州縣速與
掩瘞輦轂之下萬邦所瞻封畿之內百役斯集永言凋瘵
是用蠲除其京畿諸縣今年秋稅戶青苗及秋冬季權酒
錢每貫量放四百文從元和五年已前諸縣百姓欠負錢
物草斛斛等共一十三萬五千一百一十三貫石速委京

兆府䟽理具可放數聞奏天寶已後戎事方殷兩河宿兵
戶賦不入軍國費用取資江淮蘭絲所收寧免加厚物力
有限水旱相因歲月旣深凋瘵亦甚眷言及此憫歎良多
今上天垂休氛沴清息師旅之後又茲豐穰省事恤人庶
乎惠養其淮南浙江東西宣歙江南湖南福建山南山東
荆南等九道今年秋稅錢合上供者每貫量放三百文度
支其今年秋稅留州留使錢并鄂岳共十道每貫量放一
百文度支元和五年已前諸道州府監院送省除前制放
免外諸色欠負逋縣錢物等共四百二十八萬八千八百

貫石等監院鹽鐵使從貞元五年已後至元和五年已前制䟽理量放外應負諸色錢物斛斗共三百三十二萬二千一百五十一貫石等戶部從建中三年已後至元和九年已前除前制䟽理外諸色欠負錢物共計五十三萬九千四百六十四貫石等並委本司䟽理具徵可放數聞奏御史臺及秘書省等三十二司公廨及諸色本利錢其主保逃亡者并正舉納利十倍已上攤徵保人納利五倍已上及展轉攤保者本利並宜放免其正舉未至十倍亦委御史條䟽聞奏京城內私債本因富饒之家乘人急切終

令貧乏之輩陷死逃亡主保旣無資產亦竭徒擾公府無益私家應在城內有私債經十年已上本主及原保人死亡又無資產可徵理者並宜放免比來州縣多不定戶貧富變易遂成不均前後制勅頻有處分如聞長吏不盡遵行宜委觀察使與刺史縣令商量三年一定必使均平其京兆府亦宜準此河隴迴遠風沙早零動切烟塵之虞居勞晝夜之警方加拊勉寤寐在懷緣邊諸軍自今已後所給衣賜及軍糧價直宜委度支稍加優恤展材效用旣竭忠勞行慶覃恩所宜優給内外文武見任及致仕官三品

已上賜爵一級四品已下加一階仍賜勲兩轉神策六軍
金吾威遠皇城諸道將士等普恩之外賜勲三轉諸道將
士經淮西淄青兩度立功者更賜勲兩轉詩歌有客王道
攸存禮著先師儒風載闡永懷後嗣寧忘加恩二王三恪
及文宣公賜物五十匹仁親爲寶睦族是先帝澤所存用
頒慶賜大長公主長公主嗣王各有賜物宸居所拱禁衛
斯嚴寄切爪牙效彰忠勇恩榮素厚寵錫宜周神策六軍
金吾威遠皇城等諸軍將軍已下各有賜物其將士等長
行立仗者并守本營者每人各賜有差四夷來庭萬里觀

禮柔遠之義恩不可遺鴻臚禮賓院應在城內蕃客並節級賜物昭受冊典永垂鴻休皆爲皇臣克贊盛禮崇階高爵任子延恩式永寵章以明酬獎讀冊官侍中韓宏讀寶官戶部侍郎平章事皇甫鎛並加一階已至三品者賜爵二級撰冊文官中書侍郎平章事崔羣與一子正員官奉冊寶綬書玉冊書寶官加兩階進寶綬進冊禮儀贊導押寶綬舉昇寶冊官加一階其餘應職掌行事官寫制書官太常修撰儀注禮官并內侍省行事官三品已上賜爵一級四品已上各加一階仍賜勲兩轉鑄造玉冊并填金字

造寶官等各賜物五十段每懷先正尚想舊勲將以勸忠
故茲進錄故尚父子儀贈太師晟贈太尉秀實各與子孫
中一人八品官張巡許遠南霽雲顏杲卿真卿各與子孫
中一人出身陝州元從奉天定難功臣三品已上普恩之
外賜爵一級四品已上更賜勲三轉身歿未經追贈者宜
與追贈太學崇儒教化根本兩都國子監館宇如有隳壞
處宜令本司計料聞奏當與修葺官屬師氏委中書門下
及所司精慎選擇用賢納諫常所虛心計科求人抑有古
典天下諸色人中有賢良方正能直言極諫博通墳典達

於教化軍謀宏遠堪任將帥詳明政術可以理人者委中書門下尚書御史臺及諸司四品以下清望官五品以上清望官諸道觀察使刺史各舉所知仍限來年正月內到上都朕當親自策試宗子中如有才行可稱者委宗正寺及所在長吏具以名聞仍委中書門下量才敘用國典舊章墜廢滋久者各委本司條疏奏請當議施行元和元年已來制報處分有未遵行者委御史臺提舉聞奏大明黜陟著在格言所以考官吏之濁清究黎人之利病敷我化理屬於使臣宜委中書門下選黜陟使分巡天下恤其耆

老必及於州閭表其行義用敦乎風俗天下百姓年百歲以上各賜米五石絹二匹純綿一屯羊酒有差九十以上各賜米三石絹兩匹仍令本縣令就家存問孝子順孫義夫節婦旌表門閭終身勿事先已旌表者量加優卹祀典所載朝章是崇或美利在人或遺風可慕必資申敬乃副予誠五岳四瀆宜委本州府長吏備禮致祭名山大川及自古聖帝明王忠臣烈士各令所在以禮致祭亡命山澤挾藏軍器者百日不首復罪如初赦書有所不該者所司具作條例聞奏敢以赦前事相告言者以其罪罪之赦書

日行五百里布告天下咸使知聞

大乘本生心地觀經序

噫夫物我既殊嗜欲方熾六限陷因緣之境七情奔利害之場蓋纏其真執縛於妄愛惡攻內紛華蕩前心類騰猿身若狂象豈復悟菩提之性息塵埃以自明了真如之理本空寂而爲樂不有妙覺其孰拯斯溺乎由是至人開法大士傳教濟羣迷於彼岸漸諸妄於此門不滅不生視色空而俱泯無來無去觀性相以皆如然則泯色空者非言無以極其致如性相者非文無以會其歸設此筌蹄納諸

達路此蓋西方神人之大教也大乘本生心地觀經者釋迦如來於耆闍崛山與文殊師利彌勒等諸大菩薩之所說也其梵夾我烈祖高宗之代師子國之所獻也寶之歷年祕於中禁朕嗣守丕業虔奉昌圖聽政之暇澡心於此以爲攝念之旨有輔於時潛道之功或裨於理且大雄以慈悲致化而朕生而不傷法王以清淨爲宗而朕安而不擾敷教於下用符方便之門勵精以思是叶修行之地無爲之益不其至乎夫如是得不演暢真宗闡宏奧義者也乃出其梵本於醴泉寺詔京師義學大德闍賓三藏般若

等八人翻譯其旨命諫議大夫孟簡等四人潤色其文列爲八卷勒成一部如來祕藏歷塵劫而初開大乘真理超沙界而方證燭其昏昧示以津梁俾披閱之者甘露灑於心田曉悟之者醍醐流於性境嗟嘆不足披翫豈忘亦旣書寫聊爲序引雖離諸文字詎假發揮而啟其宗源式存年代時我唐御天下一百九十有四年也